

Der STV Einsiedeln auf Kreuzfahrt

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Bevor mir ufs Schiff sind, ganz afangs Jour,
hend zwej scho öppis bottä, äs isch fascht nöd wour.
Die beschtä vo dä Bühnimannschaft hends müessä sii
D Uufgab isch knifflig, da bruuchsch Grips däbii...
Währedem Uusrüerä d Stägä uf die ander siitä go montierä
A Klacks für diä beidä, au ohni vorhär probierä.
Flink under dä Bühni durä sind diä fiinä Gsellä (Auf Schnapsi zeigen)
nur zum go gmerkä, das mä si det gar nöd chan anä stellä.
Das darf doch nöd sii, schnäll zrugg und wieder fixierä
d Brouduusrüerer sind glii ferig, und wennd wiiter marschierä
Fluechä, chnorzä und würgä wiä glapped,
doch schlussändlich häts gad nu klapped.
Alt- Presidänt und Materialwart mir möd scho chli lachä,
lönds doch s nächscht mal wieder die Altä la machä....

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Und jetzt zur Chrüüzfahrt...
Chuum ufem Schiff aachou hät dänn än anderä Alt Presidänt afä referierä,
und sich vorbildlich a dä Bar aagfangä engagierä
Dou äs Schnäpsli, det äs Bierli ouni allzu lang zwartä,
äs isch scho nu luschtig mit sonnerä «All Inclusive Chartä»
Vorem Ässä, Nachem ässä wie chönnts au andersch sii,
isch halt scho immer äs Drinkli däbii.
Ohni Pausä und während Stundä, hät är immer wieder än offnigi Bar gfundä.
Doch ganz vernünftig hät är dänn mal entschiedä, jetzt is Bett, das wär dä Friedä.
Und siim Zimmergspähndli z liäb, also ganz brav, ziät är sis Schnarchmäskli aah,
für ä tüüfä, gsundä Schlaf.
Isteckä und aaleggä fascht wiä nä Trichter, und parat isch siin Lärmvernichter.
Wo dä spöiter au siis Gspändli id Heia hät wellä, hett mä im Zimmer, vor luuter Lärm
keis Wort chönne verzellä.
Aber das cha doch gar nöd sii, dä guet Kumpan hät ja sini Schnarchmaschinä däbii.
Doch dä Grund isch schnäll gfundä, da bruuchts kei Richter,
iigschteckt hät är s Natelkabel und nöd sin Trichter.

Liebä Roli

Wänn du so müä häsch mit Steckerli und Dösli – mir zerbrichäd üs dä Grind
Wer isch dä dä Vatter, vo dinä Chind!

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Doch au sis Zimmergspänli isch ganz en flottä und hät ufem Schiff so einiges bottä
Ä supper Idej hätter gha, dä gueti Maa
Am Sejtag chönnt mä ja, anstatt am Pool dä Fräulein nachä gaffä, sich dur die ganzi Getränkechartä
duräschaffä.
Bi so unglaublich gutä Idejä bisch nöd lang äläi, höckläd am Tisch doch scho glii d Nummerä zwei.
Mai Thai, Capi, Daiquiri und all diä War hend sie gsoffä,
Fürsi sind si chou, äs isch unglaublich gloffä.
Doch öppis hät üsä gueti Maa nöd ganz iikalkuliertä, sii Kumpan vo dä Hudy 17 isch ordäli träniert.
Gschaftt hends dänn beid, äs hät nu nöd zwölfi gschlagä, doch üsem strammä Burscht gahts rächt a
Chragä.
D Stadtbesichtigung in Marseille hät är dänn la sii,
däfur hät är s Schiff guet ghüetet, und mir dakäd ihm däbii.

Dankä Meny!
Und die Moral von der Geschichte: Gegen Gwerdi säuft man nicht!

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Soso, ä Sagwaytour chön mä machä, und i dä ganzä Stadt diä hübschä Fräulein aalachä
Doch du känsch ja diä Jungä, sie kännäd kei Gränzä,
wennd doch das Vehikel um jedä Huuseggä umäschränzä!
Nur Blöidsinn im Chopf und kei Sourg zur War, d Meinig isch gmacht äs isch sunnäklar.
Dr Jungspund Sigi isch dä ejrscht wos hät ufd Spitzä triebä
und isch mit sim Gfährt zuwüschäd zwei Betonpfiiler steckä blibä.
Doch au dä Jungturner Reto stout am Sigi i nüüt nou,
und lout bim aahaltä sin Sagway la gou.
Und au dä Jugendriegler Thuri, mit Augämäss vom nä Offizier,
schätzt der Abstand zu Trottoir wiä nach fuf Bier.
Blitzschnäll, mä mags fascht nöd erwägä, isch au är ufem Ruggä glägä.
Losäd ihr drii jungä Mannä, wänn ihr üch nöd wend verletzä
dänn dörfäd ihr nöd übertriibä!
Oder gönd doch mal go luegä, i dä Männerriigä!

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Am Oubig einisch, zmitzt ufem Mejr, sind all Turner bleich
Irgend öppis verängstigts sie sejr.
Nei, s isch nöd s Ässä und au nöd dä Wällägang
Doch dä eintä isch äs richtig Angst und Bang
Was isch dänn passiert, mues mä sich frougä,
Wo diä armä Gsellä derart tuet blougä.
Äs Unwätter wo chunnt, lääri Bierhänä oder gar en gfährliche Riisäfish?
Nei, vill schlimmer! Dä Kassier René
wiä är isch, hockt scho wieder am Kasinotisch!

Liebä René, kümmärisch die gschiider wieder um da Kassä,
das mitem Glückspiel funktioniert ja nöd ämal bim Jassä!

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Schön bekleidet söll mä go ässä hends gseit,
Und Jung und Alt hends sich richtig is Züüg gleit
Hämpli, Jacket und Kravattä in schwarz und blau
fascht gar wiä annerä Modeschau.
Au spöiter a dä Bar machts dä Aaschin,
als wäred all diä Mannä diräkt usemä Modemagazin
Doch zu spöiterer Stund wirds extem elegant,
zwei Herrä erschiined i ganz edlem Gwand
Kei Aazug oder Smoking träged diä beidä,
lieber tüend sie sich mitem Pyjama kleidä.
Also nöd ganz friiwillig, hemmer vernou
hend diä beidä dä Wäg a Reception uf sich gnou
Ganz ordnigsgemäss hend sie dä Koffer im Gang deponiert
doch gliichziitig hät sich d Türä halt sälber wieder arretiert.
Und d Schlüsselchartä äs isch gar wienä Fluech
Liit halt dinnä, uf Duvettuech.

Liebä Hans und Lui, mir hoffäd äs isch üch klar,
Fasnacht isch ämel immer aafangs Jahr

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*

Mir wüssäd, Witz sött mä nöd uf chöschtä vo andere machä
aber üchi Gschichtä sind halt scho chli zum lachä.
Mir hoffäd ihr lönd üs trotz dem Schalk wieder lagou
und mir mönd nümmä lang da vornä stou.
Aber möchtäd ihr üch rächä, so hemmer dänkt,
machäd das doch mittemä Schnitzelbank, a dä GV 2020!

*Jaja Schifflifahrä chönd sie ja
doch dr eint oder ander hät s Glück verlah
mir wend ja nöd drüber richtä
aber einä mues halt brichtä*